



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : Tir Yimym

tiryimym@aolima

tir yimym

TAPAK 3

NZ den T20 asaya atema Tongue melen Chris Jordan shimogo

PM Modi-i ISRO scientist tem ajurua tenüngsang agütsü



VOL. XX NO. 315 (ADOK 315) DIMAPUR AMUNGNÜ (SUNDAY) LUROI (AUGUST) 27, 2023 ₹ 5.00

Asür Hozheto Yeptho nem bravery award agütsütsüla: WSH

Dimapur, August 26, 2023 (TYO): State sorkari asür Hozheto Yeptho'er kibong nem teyari agütsüba den pa nem bravery award agütsütsüla ta Western Sumi Hoho (WSH)-i takhangba agütsüogo.

"August 24 anepdang asür Hozheto Yepthomi-i ISBT complex Purana Bazaar, Dimapur nung mapa teinyakdak nung tepset anungji pa nem tetushi agütsütsü tim. Asür Hozheto ya kanga dang nendaka aser bendanga agüja inyakba sorkar tenzüker ka liasü aser pa mapa inyakdang taküm bendanga agütsü" ta WSH President Shikaho Zhimomi aser General Secretary Vikato Shikhu Achumi nati sangdong ka nung ashi.

"Customs department-i apuba osettem ISBT complex nung yua aliba kümzüksü merandang Hozheto tepset. Kinungtsü kati kinungbo akoksaogo aser chirnurtemi tebu tajung ka samaogo. Anungji state sorkar den department-i tekaratiba asüri toktsür aoba kinungtsü aser chirnurtem asoshi mapa inyaktsü

mepishir" ta WSH-isa ashi.

Pai mapa inyakdang taküm bendanga agütsüba ya odangbo meyutsütsüla. Pa nem tapet tetushi agütsütsü tim ta parnokisa shisem.

Asür Hozheto Yeptho mapa nungi anisüngzüksü ano küm aika anünga liasü aser pa mapa inyakba mapang tepset asünung par kibong nungi züngsem ka nem sorkar mapa agütsütsüla ta WSH-isa ashi.

ENPO-i aitsür: Külen, Eastern Nagaland People's Organization (ENPO)-ia sangdong ka nung August 24, 2023 nü Z. Hozheto Yeptho tepsetba atema aoksaba metetdaksüogo.

Iba tatalokba nung tai tonglokja alisangi tesempatsü aser taochi maliba mapa inyakba aitsür. Ozüing amertemi iba nisung apuba atema tenüngsang agütsür aser ozüing tapet agi merenshitsu akhanger, ta Media Cell, ENPO sangdong nung shia lir.

ENPO-isa tasür kibong den asükhu lemsatepba metetdaksüogo.

Kangpokpi district nung Naga nungeri ola adoker

Imphal, August 26, 2023 (Agencies): Kuki-Zo MLA 10-i August 16, 2023 nü India Prime Minister dangi shidi züluba magizüker ta Naga People's Organization Kangpokpi District (NPOK), Manipur-i metetdaksüogo.

Kuki-Zo MLA temi Churachandpur, Chandel, Tengenoupal, Kangpokpi aser Pherzawl district 5 atema Chief Secretary aser DGP balaka meshi aser pei talidak toktsür aoba Kuki-Zo nungeri yaritsü atema Prime Minister's Relief Fund nungi Rs 500 crores meshi.

Kangpokpi district nung Naga nungeri kin 13 lir aser iba district nung alirtemi Kuki-Zo MLA temi Chief Secretary aser DGP balaka meshiba magizüker ta NPOK-i sangdong ka nung ashi.

"Iba district nung lisopur Naga nungeri mezüing aru saka tanü international border adena ozüing alema arurtem teimba kümer Naga nungeri nübo kanga ajema kümogo" ta NPOK-isa ashi.

Manipur nung Revenue Department tsüingdang unrecognized villages indang onüktem benoka lir. India sorkari Naga nungeri taginüba senzuka meyutsütsüla kechiyong

Kangpokpi district nung Gorkha nungeri aser tanga kintem den Naga nungeri aoba lir" ta NPOK-isa metetdaksü.

Pei talidak toktsür jena aoertem (internally displaced persons) Kangpokpi district nung arua melidaksütsüla aser district nung IDPS atema semi-permanent houses meyanglutsüla ta NPOK-isa ashi

Maneni Kangpokpi district ajanga süiba National Highway 2 aser 37 nung Kuki telungpurtemi tashiyim agi sen sarur aser tax meshir. Kangpokpi district nung aliba Naga nungeri COTU den kodanga inyaksema maru. Manipur nung aliba Naga nungeri COTU nung densema mali ta parnokisa ashi.

Manipur hill district tem nung aliba Kuki nungeri lisopur tenüing mashii mamshitsüla kechiyong kin o kin rara nung Naga nungeri shilem kecha mali ta parnokisa shisem.

Taoba mapang Senapati district ta aliba nungi agiteta akümba Kangpokpi district ya Kuki nungeri meyong ta mebilemstüla, ta NPOK-isa metetdaksüogo.

Parnokisa nübertem dang o mashii mejembitsü aser ozüing alema inyaksangshiba anentsü mepishia metetdaksüogo.

Manipur nung Meitei aser Tangkhul nungeri lumia sarasadem



Guwahati, August 26, 2023 (Agencies): Manipur nung tensa mejungi liaka Meitei aser Tangkhul Naga nungeri arogo lennir ana longjemer state nung yimjung aser tesünap bener arutsü meranger.

Hokolbarnü Imphal nung aliba Lanthungching Baptist Church nung Meitei Christian Churches Council Manipur (MCCCM) aser United Tangkhul Baptist Churches (UTBB) longjemer anogo piyong lumia sarasademba sentong ka ayonga agiogo.

Hokolbarnü lumiba sentongji "Be Sober Prayer" omen nung ajemdaker agi aser Dr CM Joy

Evangelist, Rev Dr Rakhon, Rev Dr Hormi Makangwo, Ayo Rumthao (Convenor Helper Prayer Group) aser Rev O Kumar, president, Meitei Christian Churches Council Manipur (MCCCM) nungeri aden.

"Manipur nung Kuki aser Meitei nungeri yimjung nung aser adianu ama liyonga aotsü atema kin ana nungi lennirtem nem Tsüingremi tangatba agütsütsü sarasadem" ta

Rev Khayaipam Khamrang-i ashi.

Khristantemi Manipur nung yimjung aser tesünap bener arutsü atema sarasademtsü

mapangji tang lir, ta paisa ayongzüker.

"Asen state nung mi adoka aronger, anungji Manipur nung Khristan ajak aser talisa Tangkhul Naga o Meitei Khristantem külemi longjemer sarasadem. Manipur nung alir ajak dang asenok ka dang ta asüba aser yimjung nung alitsü osang prokshitsü atema asenok longjemer" ta Rev Khayaipam-i metetdaksü.

"Ozüing alema inyaksangshiba ajanga iba tebilemstetsü mekoktetsü. Asenoki yimjung alitsü atema sarasademtsüla" ta paisa ayongzüker.

August 31 nü opposition INDIA bloc logo sayatsü

New Delhi, August 26, 2023 (Agencies): Indian National Developmental Inclusive Alliance (INDIA) indang logo August ita sayatsü ta Congress lennir Ashok Chavan-i ashi.

Mumbai nung INDIA indang joint meeting tasembuba amendang logo sayatsü ta pai ashi.

"Senden nung party 26 nungi 27 shi adentsü, August 31 nikongdang Mumbai nung informal senden ka aser September 1 nü formal senden ka amentsü. Onoki külem logo ka atema jembir aser ibaji August 31 nü sayatsü akok" ta Chavan-isa ashi.

August 31 nü INDIA indang külem senden tasembuba nung

opposition party 26-27 shi adentsü imlar ta taoba Maharashtra chief minister-isa ashi.

INDIA bloc indang mezüingbuba sendenji Bihar yimtiba Patna nung amen aser tanabubaji Karnataka yimtiba Bengaluru nung mena liasü.

"INDIA teloktepi sorkar akümtsü tashi anguba sülen prime minister shimsü lemtetogo. Lok Sabha elections nung takok anguba MP temi PM shimsü" ta Congress lennir PL Punia-isa ashi.

Taoba ita opposition party 26 lokteper 'INDIA' (Indian National Developmental Inclusive Alliance) tenteta liasü. 2024 Lok Sabha elections nung BJP den toktepsü

atema parnok longjemogo.

INDIA teloktepi 'Samuhik Sankalp' ta ser sangdong ka agütsüogo aser iba nung caste census, Manipur tebilemstetsü, Governors & LGs inyakyim aser demonetisation onüktem dena lir.

Opposition party 26 ya Congress, TMC, DMK, AAP, JD(U), RJD, JMM, NCP (Sharad Pawar), Shiv Sena (UBT), SP, NC, PDP, CPI(M), CPI, RLD, MDMK, Kongunadu Makkal Desia Katchi (KMDK), VCK, RSP, CPI-ML (Liberation), Forward Bloc, IUML, Kerala Congress (Joseph), Kerala Congress (Mani), Apna Dal (Kamerawadi) aser Manithaneya Makkal Katchi (MMK) lir.

Tourism Department-i Liamtra den sendakteper



Kohima, August 26, 2023 (TYO): Nagaland Tourism Department-i Hornbill Festival 2023 atema Liamtra den 'official accommodation partner' asütsü tenangzüktep ka agiogo.

Iba tesentaktep nung Nagaland nung aliba registered

homestays aser tour operators ajak adentsü. Department of Tourism nung zülüoka alir ajak Liamtra Platform nung dendaksütsü.

December 1 nungi 10 tashi Kisama Heritage Village nung Hornbill Festival amongtsü

sentong lir. Iba benjung nung adenertemi Kohima nung anenzüksü atema teyari agütsütsü ta Liamtra company-i ashi.

"Iba ya Liamtra nüma atangba mapang ka lir. Ozü company-i Something for Everyone agütsünür aser taküm Hornbill Festival nung official accommodation partner asütsüba ya maongka ka lir" ta Liamtra COO Karan Taneja-i ashi.

"Onoki accommodation solutions agütsü tenangzüker yur inyakba ya Hornbill festival tangatba den putepa lir. Nagaland Tourism Department-i onok den sendaktepsü mulungba ya maongka tulu aser kanga pelar" ta Taneja-isa ashi.

Eastern Nagaland Women Organization (ENWO) pur menden melentep



ENWO tenzükla menden melentepba sentong agir külen tangokba noksa angur.

Mokokchung, 26th Aug (TYO): Eastern Nagaland Women Organization (ENWO) pur menden melentepba sentong ka Longleng Town Baptist Church indang Chapel Hall nung Aug 26, 2023 nü agiogo, ta ENWO osang ka ajanga metetdaksü.

ENWO 2023-26 kümzük

tasenbaji President, Yingphe Konyak tokolak sür anitsü aser lai iba mendenji ENWO tesüiba lenirtem densema agizük.

ENWO tenzükler tasen shimertem atema executive secretary, PBCA, Nyenching Longleng, N. Tialemba Phom-i Tsüngrem o den temoatsü meshia sarasademtsü.

Item tenzükler tasentem ya ENWO 5 buba lokti senden Longkhim town (Tuensang) nung Aug 17 & 18 anogo ananü mungdangba mapang shimba lir. Taruba kümsük asoshi shimer tenzükler ajak agi 24 den Advisor parnok 14 lir. Iba sentong nung taoba ENWO tir aser tang tir menden agizük lai shilemagia jembi.

AR-i Khongjiri yimtsüng anasa anentsüh merektetsü

Dimapur, Luroi/August 26 (TYO): Assam Rifles den Mimi yimtsüng nung temulungertemi Khongjiri yimtsüng anasa anentsüh tulu ka alur aliba merektetsüogo. Iba ajanga arrtsü nung aliba Mimi aser Pungro yimtsüng na tsüngda anentsüh alua tesendaktep raksar aliba tanaben lapokshio.

Tzünglu medangi aruba sülen anentsüh aluba ajanga iba

lenmang nung senzusenpong mejungi aküm aser nüburtem aika libaliro nung tetsükdaksü adoka liasü. Jongdak nungdak angateta Assam Rifles Kiphire battalion-i, JCB densema hadir balala aser sepaitem yoka iba anentsüh merektetja liasü.

Kasa mapang nung Mimi yimtsüng nung alirtemia lenmang merektetba nung tongtibang shilem agia parnok telongjem

sayuogo. Parnoki teyari agütsütsü mulungsoa aliba sayuba ajanga iba tesem nung alirtem tangatetba sayur.

Anentsüh takok ngua merekteta lenmang lapoktsüba ajanga tesendaktep tanaben amenokshitsüba dang masü saka tetsükdaksü adoker aliba mapang longjemer inyaksü mulungtetertemi bendanga agütsüba sayur.

Kohima nung Balidan Diwas anogo mungogo



Balidan Diwas (Martyrs' Day) anogo ayongzüka amungba noksa nung angur.

Kohima, Luroi/August 26: Gorkha nungertemi veer saheed Major Durga Malla aser veer saheed Captain Neikezhakuo Kenguruse na tenüng nung Balidan Diwas (Martyrs' Day) anogo ayongzüka mungogo. Iba sentong ya GPPK Multi-utility Hall, Chandmari Kohima nung agia liasü.

Iba sentong ya Kohima nung aliba Gorkha nungertem indang NGO, club aser Jatiya Sansthas ajak den longjemer Gorkha Public Panchayat Kohima (GPPK)-i ayongzüka liasü, kong Inspector General of Assam Rifles (North), Maj Gen Vikas Lakhera alakteta jaoker liasü.

Sentong nung o jembiba mapang Maj Gen Lakhera-i ashiba agi, nisung kati pei taküm bendanga agütsütsüsa akümba ya tejashitsüka, saka

tasü tait nisung anati linük asoshi pei taküm bendanga agütsüogo aser asenoki parnok tushitsü nungdaker, kechiyong parnok ajanga taruba putu ajungmesotsü.

Pai linük asoshi taküm bendanga agütsür ana nem salute aser tetushi agütsü aser tena ajanga lanurtem ajungmesotsü imlaba lemsatet.

Assam Rifles ketdangsür ka ama pai, linük asoshi nokdakba mapang pei taküm bendanga agütsü aser tasü ita pei mapa inyakba atema Gorkha nungertem tenüngsang agütsü liasü.

Maneni pai, Gorkha nungertemi pei sobaliba aser libaliro wazüka ayuba aser iba den lanurtem nem angazükdaksüba atema kanga pelaba lemsatet.

Iba sentong ya Yommi Rai

lenisüba nung agi aser tejaokertemi milen tsükdaksüba den asür captain Kenguruse'er tsürapurtem aser tangartemi asür nem naro agütsüba sentong agia tenzük.

Kasa mapang nung GPPK tir Santu Thapa-i lokti pela agizükba o jembi aser Chandmari Gorkha Union secretary Samir Thapa-i tepela anküp o jembia liasü.

Sentong nungsa HSSLC 2023 Science Stream nung jenjang 6buba ngutetba atema Manav Gurung nem tetushi agütsü liasü.

Maneni, Monica aser lar medemertem, Deepti Gurung aser medemertemi sobaliba saya balala saya, Karishma Baraily patriotic ken aten aser Vivela Club-i lokti pela agizükba ken tena liasü.

Mokokchung DEO-i sangdonger

Mokokchung, 26th Aug (TYO): Mokokchung district kübok GHSS/GHS-tem aser private school densema 'Teachers Day Token' (teachers Rs. 10/- aser students Rs. 5/-) District Education Office, Mokokchung nungi Aug 28 nungi Sept 2, 2023 tashi nung

agizüktsü asoshi Principal/ Headmaster ajak dang sangdongba osang ka Mokokchung DEO, Wt. Sentinenla-i metetdaksüogo.

Pei school indang enrolment osang tejangja school tokolaktemi anepalua tongtsütsü asoshi DEO-isa metetdaksü.

Dimapur Sumi Council-i Hozheto Yeptho tepsetba aitsü

Dimapur, Luroi/August 26 (TYO): August 24 anepdang ISBT Dimapur nung NST nung inyaker Hozheto Yeptho, Noknyei Konyak-i taochi makai tepsetba Dimapur Sumi Council-i aitsüogo

Dimapur police dang kanga pelaba metetdaksüogo aser ochi obendang agütsütsü atema aija alir anema temzüng ozüng kübok tapet temerenshi agütsütsü takhangba agütsüogo.

Maneni Dimapur Sumi Council-i, asüsang kinungtsü, chirnur aser kinungertem den asükhu lemsateper, ta DSC tir Shikuto Yeptho aser Press Secretary D. Jonah Achumi nati sangdong ka ajanga metetdaksü.

Iba amala inyakyim asoshi tanü asünung asen lokti nung kecha shilem mali aser lisopurtem ajaki aitsütsü nungdaker. Ken o nung aibelena alir takaratiba nung apuba atema Dimapur Sumi Council-i

Fazl Ali College Students' Union Election agiogo



Dimapur, Luroi/August 26 (TYO): 2023-2024 session atema August 25 nü Fazl Ali College nung College Students' Union Election agiogo. Iba ya küm shia agiba college sentong ka lir.

Election ya secret ballot system ka amshia kanga benteta aser tesunep nung agiogo aser tesayurtemi achayanga liasü, kong kaketshirtemi parnoki saklokba candidate nem vote agütsü liasü. Vote timtiba anguba kaketshirtem ya tesayurtemi executive mapa balala atema asadanga liasü. Kaketshirtem asadanga sülen mapa balala asoshi kaketshirtem sangdongogo.

- 1) General Secretary - Asensor Jamir (BA 3rd Semester)
- 2) Assistant General Secretary - Andrew W Ngullie (BSc 3rd Semester)
- 3) Games and Sports Secretary - Tolibo (BA 5th Semester)
- 4) Assistant Games and Sports Secretary - Sentichuba (BA 1st Semester)
- 5) Social Service Secretary - Moatemsu R Ao (BA 3rd Semester)

6) Assistant Social Service Secretary - Imlimenla Ao (BSc 1st Semester)

7) Fine Arts and Literary Secretary - Vivono Luho (BA 3rd Semester)

8) Assistant Fine Arts and Literary Secretary - Imtilong (BA 1st Semester)

9) Assistant Magazine Secretary - Kinivi M Kinny (BA 5th Semester)

10) Boys Welfare Secretary - Aosen Amer (BSc 5th Semester)

11) Girls Welfare Secretary - Nochetinla (BSc 5th Semester)

Principal, shiba FACSU tir lir, pai Vice President aser Magazine Secretary mapa atema candidate nominate asütsü koba election ajanga meshimi liasü.

Kaketshir lokti tentet ya college nung tongtibang shilem ka lir. Iba ya kaketshirtem tebilemba lemsateptsü atema aser temelenshi asoshi lokti tentet ka lir. Election nung kaketshirtem aikati shilem agiogo aser result ya telok ajaki agizüka liasü, ta Fazl Ali College, Information and Publicity Cell sangdong ka ajanga metetdaksü.

PM Modi-i ISRO scientist tem ajurua tenüngsang agütsü



Bengaluru, August 26, 2023: Honibarnü Ato kilonser, Narendra Modi, ISRO Telemetry Tracking and Command Network (ISTRAC) tonga arudang ISRO Chairman, S. Somanath-i pa agizükba noksa nung angur.

Bengaluru, Luroi/August 26 (Agencies): Honibarnü Ato kilonser Narendra Modi Greece nungi meyipa aruba sülen Bengaluru-i oa ISRO indang mission control centre semdanga ISRO chairman, S Somanath dak azüiter tenüngsang agütsü.

Paisa Chandrayaan-3 mission takok ngua ita nung anentetba atema mission directors, tetsür scientist tem aser space scientist ajak nem tenüngsang agütsüogo.

ISRO chairman, S Somanath-i mission control centre nung Ato kilonser Modi agizüka liasü.

Chandrayaan-3 mission takok anguba atema tetsür scientist tem nem tenüngsang agütsü Modi-i, "Iba mission nung linük nungi 'Nari Shakti'-i shilem tulu agiogo. Vikram ita nung anenzükba aser ita nung rover jajaba screen tulu nung nguogo. Nenoki India temaba jenjang nung ajungkettsüogo," ta metetdaksü.

Chandrayaan-3 mission ya India nunger space programme puti otsü nung khenyongi balaka, ta shia Modi-i, "Anenzükba tesem nem nungja agütsüba scientific sobaliba ka lir. India-i Chandrayaan-3 indang Vikram lander anenzükba tesem dang Shiv Shakti point ta ajatsü lemtetogo," ta metetdaksü.

"Shiv nung meimchirtem ajungtsü atema bangzüng ka lir aser item bangzüng ataloktsü atema Shakti ajanga asenok nem tashi agütsü. Iba Shiv Shakti Point ajangasa Himalaya nungi Kanyakumari tashi tesendaktep tanela agütsütsü," ta pai ashi.

Paisa, "2019 küm Chandrayaan-2 lander ita nung tsükokba tesem dang 'Tiranga Point' ta ajatsü, aser Chandrayaan-3 ita south pole nung anenzükba anogo August 23 ya küm shia National Space Day anogomong asütsü," ta metetdaksü.

Isro scientist tem den jembidang Modi-i, "Nenoki

meranga inyakba atema ni tetushi agütsür, nenok dak taremkükba tanela aliba atema tetushi agütsür aser nenoki temelungtetba yur inyakba atema tetushi agütsür. Nenoki India temaba jenjangi ajungkettsüogo. Ita nung asen linük akhümket yuogo. Shingai metongtetba tesem asenoki tongtetogo. Iba ya tanü Bharat, tashitait Bharat aser tangar dak memetalokba Bharat lir. Iba Bharat tammang tesemi ao aser alima dang tesangwa sayur. Aso 21buba nung iba Bharat yagi alima nung tayongzükba tulu koktettsü," ta metetdaksü.

Ita nung Chandrayaan 3 anenzükba bilemteta Modi-i, "Ni item ajak tu bilemteter. Ita nung anenzükba mapang linük tesem ajaklen nüburtem tepela nung jokdena liasü. Shibai iba tu amadoktettsü, kechiyong iba ya puti otsü ka kümogo. Iba ya ajak atema tatishitsü asütsü. Iba ya India-i tatidang tuluka koktetba amai lir. Iba takok ya nenok ajanga lir," ta ashi.

Jammu & Kashmir nung security sepaitemi kiralongrar ana apu

Jammu, August 26 (Agencies): Honibarnü security sepaitemi Jammu & Kashmir kübok Bandipora district nung kiralongrar ana puogo, ta police-i metetdaksü.

Kiralongrar tem senzüsempogba osang lazükba sülen Hokolbarnü Dardgund area nung chechpoint ka amenoka liasü aser iba tesem nung sepaitem aliba ngua nisung ka ajen saka sepaitemi apu; pa

ket nungjagi pistol ka, pistol magazine ka, injang ti aser tashishitsü kakat kar angu, ta police otongdar kati metetdaksü.

Kiralongrarji Shafayat Zubair Rishi lir ta jangaogo.

Police-i asüngdangyaba mapang nung Rishi-i, kiralongrar commander asür Yousuf Choupan kinüngtsü, Muniram Begum ket nungi pai raraba hadir agizüktsü tebilemba liasü ta nangzük.

Iba sülen Munira Begum-a puogo.

Rishi jagi Pakistan nung amenoka aliba kiralongrar Mushtaq Ahmad Mir den tongtepratepa liasü aser Bandipora district nung kiralongratsü sentong liasü.

2000 küm Kothibagh nung bomb lendong agütsüba nunga Rishi-i shilem agia liasü. Iba tatalokba nungji police 12 den civilian ana asü.



August 26, 2023 nü Jammu nung Jammu Bar Association züngsemtemi smart meters aser Sarore toll plaza anema longkak aيتدang tangokba noksa nung angur. Chamber of Commerce & Industries-i iba sentong ayongzükba liasü.

INDIA teloktep senden nung Sub-Committee tentettsü atema jembitsü

New Delhi, August 26 (Agencies): INDIA opposition teloktep indar aser August 31-September 1 anogotem nung Mumbai nung ayongzükba tasembuba senden nung Sub-Committee tentettsü atema jembitsü, ta osang ka ajanga metetdaksü.

Taruba senden nungbo Maharashtra Shetkari Dal-a adentsü.

Taküm June 23 nü Patna nung ayongzükba mezüngbuba senden nung opposition party 16 dena liasü, iba sülen July 17-18 anogotem nung Bengaluru nung ayongzükba senden nung party 26 aden aser Mumbai nung ayongzükba senden nung ano party kar bendenloktsüa akok.

Mumbai nung ayongzükba senden nung sub-committee tentettsü atema jembitsü aser state tem jenjang nung teloktep atema group public meeting ayonga agitsü atema jembitsü.

Sub-committee tentetba ajanga sangküm Lok Sabha election nung BJP-i aniba National Democratic Alliance (NDA) den tokteptsü atema asalentong yanglua inyaktüsü.

Mumbai nung ayongzükba senden nungjisa iba teloktep atema national convenor

shimtsü atema o lemteptsü, ajisiuka lenirtem aikati national convenor meshimyonga party balala nungi züngsema aliba sub-committee-i mapa ajak jeta inyaktüsü, ta bilemer.

Mumbai nung ayongzükba senden nungjisa common minimum programme draft aser INDIA teloktep logo atema o lemteptsü.

Mumbai nung iba senden ya Maharashtra nung Maha Vikas Aghadi (MVA) teloktepi ayongzüktsü; iba teloktep nung party asemji Congress, Nationalist Congress Party aser Shiv Sena (UBT) party tem lir.

Iba senden nung party balala nungi lenir 80 shi adentsü aser senden nung jembitsü onüktem rongnung yimtenren onüktem, osettsüset nung jenjang maneni atuba aser mapa manguba tebilemtsü onüktem nung ajemdaker BJP anema raratsü atema jembitsü.

Ato kilonser candidate shimtsü atema jembitsü asü?, ta asüngdangba langzüdang lenir kati, Ato kilonser candidate atema mejembitsüa akok, kechiyong party temi common minimum programme mezüng renemtsüla, ta ashi.



August 26, 2023 nü Mandi district nung tzunglu sashia aruba sülen Pandoh anasa Kiratpur-Manali lenmang anensar aliba noksa nung angur.

Tamil Nadu nung train lendong nung nisung 10 asü aser aika yiru

Madurai, August 26 (Agencies): Honibarnep züngia Tamil Nadu kübok Madurai railway station nung anena aliba train ka takdang nung mi adok, aser iba lendong nungji nisung 10 asüba den nisung 20 dak tema yiruogo.

Bharat Gaurav tourist train ji Lucknow nungi Rameswaram-i aoba mapang Madurai railway station nung anena lia mi adok.

Southern Railway ketdangsertemi ashiba agi, train nungji ozüng alema gas cylinder ka bena liasü aser iba nungjagi mi adoka train arong.

Southern Railway ketdangsertemi iba lendong nung asür shia kibongtem nem sen lakh terer (10) agütsütsü, ta sangdongogo.

Iba lendong osang angashia

Madurai district collector, M S Sangeetha iba tesemji tonga ao.

Train nung miji anepdang 5:15 ako meta adok saka Fire service sepaitem ghonda tesadang shi lir ang iba tesemji atong aser 7:15 ako tashi nung ang mi ensepteta liasü.

"Private party coach nungji passenger temi ozüng alema gas cylinder ka bena liasü aser ibaji ajanga mi adok," ta Southern Railways-i metetdaksü.

"Party coach ji August 17 nü Lucknow nungi apusoa liasü. Parnok asüng (August 27) Chennai tonga arutsü liasü aser yang nungjagi Lucknow-i meyipa aotsü liasü," ta parnokisa metetdaksü.

Iba lendong nung asürtem rongnung Uttar Pradesh nungia passenger trok liasü.



TIR YIMYIM YIMOBILEM (EDITORIAL)

DIMAPUR AMUNGNÜ, LUROI(AUGUST) 27, 2023

Asen kolok aser temulungjang

Asen dak temang telonglen tashidak lira, iba jagi tejak dena tobur mejungdaksüba ama, asen kolok aser mulungsentsü nung tamajung bilemba lira, iba jagi asen jembishinü aser inyaksangshi yimya tobur mejungdaksür. Aji oda, asen taküm yimya aser libaliro agi asen molungjang sayur. Ibayongji, Tenyar Pauli pa den külem tenzüker par medemer Tita ajungshia züludang, tajung bilemertem tsüngdangbo ajak tajung dang asütsü saka tamajung bilemertem tsüngdangbo ajak tamajung asütsü ta zülu. Asenoki ibaji Tita tapu 1 tekong 15 aser 16 nungji züngdangra yamai shia angutsü, "Temerük purtem dangbo ajak emerük, saka memerükba purtem asoshibo kecha emerük maka, saka parnok kolok aser molungsentsü na prongla emerük. Parnoki Tsüngrem meteter ta nangzüker saka parnok mapa agi parnok Pa menanzüker. Parnokji tesempatsü tashi manga aser mapa tajung ajak asoshi metemsü." Iba Laishiba tekong nung ashiba Tsüngrem o ya jungjunga züngdanga bilemdangra, iba jagi asen mulungjang ateta atsüngtsü. Aji oda, iba o ya tangar dang masü saka asen dang ashir ama asenoki angatetsü. Iba jagi, Yisua Luke 6 nung, pei nük nung aliba anak tama endoker külenang tangar nük nung aliba anak endoktsü indang shia lir. Tanü tensa asen taküm lokti nung liyonga aotsü asoshi ibaji kanga tongtibang asütsü. Asen taküm, asen kolok aser asen mulungjang ya temenen agi nembanga lir, iba jagi asenoki tangar dak tajung aliba mereprangtetter. Aji oda, kodang asenoki tangar dak tajung alibabo kecha mangur saka tamajung-tamajung dang reprangtetter ta südir, timtemji yang nung jagi tenzüker. Kinungboi kinungtsü dak tamajung-tamajung dang reprangtetter, yamaji kinungtsüia kinungboi dak tajung kecha mereprangtetter ta asüba agi, ajak majung ser kibong raksaba aika lir. Aji oda, peisasa pei taibo mangur saka tangar tai dang angur ta asüba agi yimten aser lokti mesüngjemtetter. Ajisüaka, kodang asen shisatsü merüka lidir, aseni tangar asoshi tamajung meblemtsü, tangar dak temulung malemba shisatsü malitsü aser tangar dak tai mebushitsü. Aji oda, asen mulungjang merüka lira asenoki tenük agi tangar dak tajung angutsü. Mathi 6:22 nung ashiba ama, asen tenük agi tangar dak tajung anguba ajanga asenok pelaa alir. Ibaji jangratemtsüka lir. Ajisüaka, nisung dak alima yimya ka lir aser aji, nisung shiai tangar-a pa mesüra la amaji dang bilemer. Anungji, nisung tamajung purtemi tangara pa ama mejungi alitsü ta bilemer aser tajungertemi tangara pa ama nisung tajung asütsü ta bilemer. Nisung tapu ana rongnungji asenoki tajungbaji shimteta shisatsü aser tekolok nung teti tajung bilema tangar dang beshitsübaji Khristan taküm ka asoshi kanga tongtibang asütsü. Khristan taküm ka asoshi pa mesüra la kija kümzüker lokti nungi pilar kija alitsübaji masü saka pa dak tajung aliba jagi tangar mulung sangwadaktsüsüla. Tanü asenok Khristan purtem dak tangar metsüdaktsüsa aliba tashimait tulutibaji, Tita kakat nung shia aliba ama, asenoki Tsüngrembo metet saka asenok mapabo Tsüngrem memetetba purtem ama inyaker. Asenok ajak asoshi tekümdangtsüji aji lir. Asenoki tangar anema tamajung meblemtsüla, kechiyong tangar anema tamajung bilema asenoki Tsüngrem temeim indang mejembitettsü aser tangar denji meputetetsü. Aji oda, asenok kolok aser molungjang nung tajung bilemdi asüyonga makokba timtem lira, ibaji Tsüngrem dang ashitsüla. Atangji, asenok karibo temulung nungboi tajung inyaker saka mapa agi mesayutetter ta alitsüa akok. Iba ama timtem aser shisaboluji lira, tenyar Paul-i ashi ama, ibaji aseni masü saka asen dak aliba temenen agi inyaker aser asen dak temenen ali tashi asenoki tangar dak tajung mangutsü aser asenok pelaa malitsü. Iba ama teblemtsü agi na tonga lira, Tsüngrem dang asen kolok aser molungsentsü merüktetjang ta sarasademtsüla.

OLEMSABANG

BIBLICAL CHURCH MODEL (BCM) YA KECHI KOMALA

- Limawati Longchar, Kohima

Ni laishir ka mesüaka Khristan ka ama arogo, mungdang aser theological college ana asem nung tenzüka yaritepa küm aika aru. Iba mapang Biblical Church Model (BCM) ta asüba olong mesüra tangatetba (concept) indang mangashi dang liasü. Saka Tawa tanü ka nungi BCM indang jembiba aser züluba kanga angashir aser züngshir. Aser tawa ang angazükba agi ABAM 2016 küm Central Council nunga ibai benoka jembir lim arogotemi inyaksü pangzüng renem. Ano tan ita (August) tetenzüklen Tir Yimyim nung L. Kika Pongeneri 'Biblical Church Model ya Ao arogo ajaki agizüktsüla' ta ocet ka züluba züngshi.

Anungji Biblical Church Model ya kechi, komala arogo ka ta kanga bilemdanga, metetnüa hapta ishika bushidanga liogo. Laishiba nung Tenyartem Mapa, Timoti aser tanga kakat nung arogotem indang züngdanga aser internet nung Tasen Lai mapang aliba arogotem (New Testament churches) otsü aser ocet kar bushidanga liogo. Saka kecha nunga arogo inyakyim aser tarensen/telatet (functions and structure) tejangja mangu. Kidang sentepba arogo (house church), Tamburtemi (elders) achaayangba/aniba arogo, Sannükertemi (overseers taa English nung agüja lir) aniba arogo ta, ajakji oda tejangja telatet kangabo maliba (informal, loosely structured) arogotem indang dang züngshi.

Yamaji ni metetnüba, mejangjaba onükji kecha nunga tejangja mangu nung Tir Yimyim nung ocet zülur mesüra laishir kari item teküpoklen agüja aliba onüktem ya jangjashitsütsü mepishia asüngdang. Kar-i iba telangzüba agütsüra ni dang masü ni ama rataa alir tamangertem aika tajangzük asütsü ta mepishia asüngdang.

1. Laishiba arogo (Biblical church) ta asüba ya koba arogo ashirba? Kechiyong Laishiba nungji arogo balala aika indang shia lir.
2. Laishiba Arogoji shibai tentet? Tamangertem sentepa arogo tenteter parnok anitsü aser parnok dang sayudaktsütsü pastor/sannüker anir aru asü, pastor/sannüker, tamburtem jaki nütsüng/temulung meyipertem anitena arogoji aküm.
3. Laishiba arogo nung pastor/sannükertemji taah/ita sen (remuneration/regular salary) aser tanga nungdaktem (facilities) agütsü asü?
4. Arogo Tamburtem menden, Dikon menden aser mapangser liasü asü masü? Tamburtem aser Dikontem rong nung tetsüra liasü asü masü?
5. Arogo nungji Tetsür, Lanur aser Tila-tanur department/ministry etc. liasü asü masü?

Item dak alaka ano Mungdang mesüra arogo lenir kar-i Ao Baptist arogotem ya Episcopal Arogo asü, Presbyterian arogo asü, Congregational Arogo jangjadaktsü nung kanga ajungtsü.

YIMJUNG POKÜMER MALI

- P. Renthly Jamir

Tang alima rangben nung nungdaka jembiba onük Russia-Ukraine War, aser Manipur lima tia, iba ana ya ajaki T.V. aser phone whatsapp nung angur osang kakat balala nung azünger. Anungji tila tanur katia meteta lir. Saka ana nung ya temaba yimsüsür aser arogo lenir tebang nembanger kazüba ojang ishika koba agi Naga lima tashi kongshir, itemji zülur. Mezüngbuba nung alima ana Russia-Ukraine rara indang ya ajaki nguametedar asünung tanga kecha mezülur Russia nung khristanpurtem atema ojang kar zülur Russia Orthodox Church nung putir (Clergy) 40,000 dak tema lir ta ashir. (Reverendtem) kodang Russia Armytemi 24-2-2022 6:00 ako anepdang nungi tenzüka ali nung, anüng nung tzüyim nung külemi Ukraine amak idangji Russia nung lawyertemi shibaisa army tepo küma mesemlir aser sepay ozüng mangalir temerenshi tulu alitsü ta ozüng yanglu (law passed) anungji meraratsüla ta yimjung indang jembir ajak tebang shibangtsü kechiyong tetsübu nung alir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kohima Liangmai Baptist Arogo nung tetsürtem seminar agi



August 26, 2023 nü Kohima Liangmai Baptist Church D Block nung Arogotsür Department-i anogo ka seminar ayongzüka agiba sülen shisalen sayur Nagaland Baptist Church Council (NBCC) Women Secretary, Kr. Visasieii Dolie den seminar nung adenerkem tangokba noksa nung angur.

Kohima, August 26 (TYO): August 26, 2023 nü Kohima Liangmai Baptist Church D Block nung Arogotsür Department-i anogo ka seminar ayongzüka agi, aser iba sentong nung tongti o jembirji Nagaland Baptist Church Council (NBCC) Women Secretary liasü, ta Rutmakbo, Media cell KLBC D.Block sangdong ajanga metetdaksü. Seminar nung jembidang shisalen sayur NBCC Women Secretary, Kr. Visasieii Dolie-i, kibong kaji shi agi masü saka

tanela agi yangerteter, ta ashi. Arogo ya kibongtem tanela khuret bendaktsütsü aser tashi itdaksütsü atema lir, ta lai ashi. Laisa, Khrista dak yangerba Arogoi kija kibongtem Khrista dangi anasatiba anir, aser Khrista nung kibong ka tashi itta yangertetsü atema yarir; iba dak alia Arogoji kibong ka tanela nung indaktsütsü atema lir, ta metetdaksü. Laisa kibong nung apuani tsüingda tesendaktep, tsürabur o tanur na tsüingda tesendaktep aser kibong nung adianutem

tsüingda tesendaktep tajungba akümtsü atema tesayuba balala agütsü. Kasa seminar nung kibong nung mangatettep balala bentetsü aser kibong nung tesünep alitsü onüktema jembia liasü. Anogo ka seminar ya anepdang 10:00 ako nungi tenzüka anogo piyong agia liasü. Sentong tembangba sülen Women Department-i lokti chiyungdaksü aser Youth department KLBC D.Block-i Arogotsürtem nem chiyungtsü anganüa agüja liasü.

ANOGO ABEN TSÜNGREM DEN

TANGAR ASOSHI INYAKBAJI

"Shibai sensaker indang bilemetsür pa temoatsüba, tamajung anogo nung Kibubai pa kümzüksü" ~ T. Ken 41:1.

Meimchir timtem nung alirtem tali teimba akümer. Yimti yimtung nung, office kima nung, bus aser train anendak, item tesem ajakji parnok yipden kümer, jana toktokdak par chiyungtsü bushidak kümer lia odagi. Alima kar nungbo yamala timatemer tongtibangsa tetsürtem asoshi social workertemi ki yanglua talidak agütsür, aser chiyungtsü agütsür.

Yamala nisungtem asoshi asenokia kechi inyaktsü? Yisu Khristai ashiba ya kanga tejangja lir, "Ni kodang yaa liasü, nenoki kü nem chiyungtsü agüja mesü aser nenoki kü nem tajemtsü tzü agütsü, ni aiener süa aliba mapang nenoki ni aniok, mangsa liasü nenoki abentsü, ni shiranga liasü aser nenoki ni semdang, ni tepuokdak liasü aser nenoki kü dangi aru, ni nenok dang adangji ashir yamala nüngdakba pur ka dang tanga nenoki kechi inyak aji nenoki kü dang inyak" Mathi 25:35-40.

SARASADEM:

Kibuba, ktt mulung/ang nung tangar dang meimisti aser kü teka agi langar yarisü ni yariang. Amen.

UN headquarters nung Pakistan nung Khristantemi longkak ait

August 26, 2023: August 24, 2023 nü Manhattan, New York nung aliba United Nations headquarters nung Pakistani-American Khristantem aser Pakistan nung Khristantemi longkak aita Pakistan nung Khristantem anema inyakba anentsü atema takhangba agütsü. New York nung aliba Arogo, Brooklyn nung aliba Arogo, Albany, Philadelphia aser Virginia nung aliba Arogotem nungi Khristantem adenshia longkak aitba sentong nung shilem agi; iba sentong nungji Pakistani-American lenirtemi o jembia liasü. Longkak aiterkem jagi Kangki den Pakistan nung wako, America nung wako aser ozülu balala amer, "Pakistan nung Tenla kitem rongdoktsüba anenang" aser "Pakistan nung Khristantem nem temeden agüjang" ta yimyim ayima liasü. Nikongdang ghonda asem shi sentong agiba mapang nung tzüinglu arua liasü. Iba sentong nungji Pakistan Mission to United Nations nung ketdangsertembo maden. Pakistan nung Khristan kati Muslim nung temeshi kaket Koran shisaja Tsüingrem

mezüingmeshiogo, ta tai tonglokja August 16 nü Muslim nungertemi longkak aitba mapang nung Tenla ki 19 den Khristantem ki 100 dak tema rongdokja liasü. Islamabad nungi mile 210 shi pilar aliba Jaranwala yimdak Khristan denomination balala indang Tenla kitem rongdoktsü. Pakistan sorkari takoksa angur Khristantem nem senotsü teyari sen million 2 agütsütsü, ta nangzüko aser police-i aibelener Muslim nung aika pua lir. Longkak aitba sentong nung jembidang taoba mapang Philadelphia nungi US Congress candidate, Aaron Bashir-i, "Pakistan nung meimchir dak mapetba mapatem, taochi maketba aser anemsü mapatemji aitsütsü atema asenok yangi adenshia lir. Pei taküm kümzüksü atema nisungtem ajentsüsa aküm, talisa tanurtem süochi mesüra chiyungtsü makai aonung alu nung mejangtsüsa aküm," ta metetdaksü. Bashir-isa Pakistan nung Khristantem dang parnok shimetba sorkar lenirtem aser US sorkar dang Pakistan nung Khristantem kümzüksü atema

mepishitsüla, ta ajungshia liasü. August 24, 2023 nü US nung amenoka aliba Pakistan nung Khristan melungtet telok- International Community Care Foundation-i sangdong ka ajanga Pakistan nung Khristantem anema inyakba aitsüba den külemi sorkar aser police dang linük nung Khristantem ajak kümzüksü atema takhangba agütsü. "ICCF-i tawa Pakistan kübok Jaranwala nung Khristantem amakba, Tenla kitem, Laishiba, Kangkitem aser Khristantem meyong kiojen raksatsüba tatalokbaji sashia aitsür," ta International Community Care Foundation-i metetdaksü. Tamangba yimsü nung ajemdaker amakba International Day anogomong (August 22) sentong nung Pakistan nung Khristantem temeden anema inyakba tebilemetsü lemsatepa liasü. Tang Pakistan linük nung nütsüing million 200 dak tema lir, aser iba nungjagi nütsüing million 1.3 shi Khristantem lir. Alima nung Muslim nung nütsüing teimtiba aliba linük ishika rongnung Pakistan densema lir.

Taküm UP nung anti-conversion ozüing kübok Khristan 91 apu

August 26, 2023: Taküm küm tenzüker tang tashi nung Uttar Pradesh state nung anti-conversion ozüing kübok Khristan 91 puogo. Uttar Pradesh nung pastor Dinesh Kumar-i, "Atangji iba ya tebilemetsü onük ka lir, kechiyong ozü nüburtem (Khristantem) dang asüingdangyar, apur aser amokmerener," ta ashi. August 25, 2023 nü osangbener den jembidang pastor-i, "Tamangba yimsü meyipdaksüba lira nüburtem nem iba osangji metetdakjang aser ketdangsertemi iba kuliji agütsütsüla," ta ashi. August 22 nüa Uttar Pradesh kübok Kushinagar district nung Khristantemi tangartem yimsü meyipdaksür, ta tiyazü nung tai tonglokja Khristan pongu apu. August 15 nüa UP kübok Jaunpur district nung pastor asem densema Khristan pongu apu. Police-i, Kushinagar nung Khristan pongu apu, aser parnok rongnung Ramchandra Sahni-i August 21 nü par kidang sarasadem ayongzüka liasü aser iba mapang nungji parnok kiyonger kar Khristan yimsü dangi meyipdaksütsü merang, ta

metetdaksü. Vishwa Hindu Parishad (World Hindu Council) nung züingsem kati ken o benokba nung ajemdaker police-i Khristan ponguji apu. Police inspector, Vinay Kumar Singh-i, Uttar Pradesh Prohibition of Unlawful Conversion of Religion Act ozüing kübok parnok Khristan pongu anema ken o benok, ta metetdaksü. Jaunpur district nunga anti conversion ozüing kübok tetsür 19 densema Khristan 37 anema ken o benoka lir. Iba ken o nung parnok aitsüra tajemba agi küm 3 tashi jail nung puoktsü. Osang angazükba agi, tesüiba ita 8 tsüingda (January-August) Uttar Pradesh nung anti-conversion ozüing kübok Khristan 91 puogo. Pastor Dinesh Kumar-i, iba ozüing kübok apur Khristantem teimbaka chiokogo, kechiyong Khristantem anema kuli tejangja mangu. Pastor-isa, Khristantem nem tai tonglokja apuba ya Khristantem tenüing menüktsütsü atema dang lir, kechiyong Khristantem azükarua dang alir, ta ashi.

AO OSHI ANGAZÜKDAK:
TANÜ ANGAZÜKTSÜBA OJANG



Rüpok

(V) Pereppok, chipok (drilled, damages caused by termites)

* Asen lima nung shipoi süng ajak **rüpoka** achir.

Rüpinga

(adj) aritepa (hastily)

* Len talang asüba agi tanep onok **rüpinga** apuso.

OLONG PAITEP # 6618

1				2				3		4
5		6								
							7			
8										
										9
			10				11			
				12				13		
14										
							15			
16										

TIPLÉN		LANGTSÜNGLEN	
2. Auo nung chiyongsü asenba	-(7)	1. Lenmang	-(7)
5. Mangyimba mapang	-(5)	2. Aor kidong ka tenüng	-(6)
7. O tamendakdak	-(4)	3. Tenarong maten	-(6)
8. Pei dak malangba	-(7)	4. A _ _ _ g	-(3)
10. Juli	-(7)	6. Mopung apodoka	
12. Sen ayudak	-(7)	ola adokdaksüba	-(3)
14. Tenük agi ajitet	-(4)	9. Tonglipang lagtsü	-(7)
15. Tamajung aküm	-(5)	10. Menungra bilem	-(6)
16. Apuso	-(7)	11. Aiür	-(6)
		13. S _ _ _ k	-(3)
		14. T _ _ _ r	-(3)

OLONG PAITEP # 6617 TELANGZÜBA

TIPLÉN :		LANGTSÜNGLEN :	
1. Anitet, 4. Tola, 6. Apet,		1. Asang, 2. Teti, 3. Tila,	
7. Lungmi, 10. Telongjem,		4. Tanü, 5. Lemjem, 8. Sot,	
15. Nuoshi, 16. Zion,		9. Agi, 10. Tenüng, 11. Tanük,	
17. Ngüm, 18. Rakzük.		12. Asem, 13. Aier, 14. Azük.	



KINUNGTSÜ O KINUNGBU NA KIBONG NUNG RATATEPER :



Kinungtsü : Saalaa, ni ya mato aja, nü den kibong akümbaya sasasetera nii.

Kinungbu : Temeim nung tenük poker na matoba ya menur ang lazükera nii.

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Himanta Sarma-i dang lemtetemagir: Akhil Gogoi Guwahati, August 26, 2023 (Agencies): Chief Minister Himanta Biswa Sarma-i democratic inyakyim anema telemtetbatem agia mapa inyaker ta Sivasagar MLA Akhil Gogoi-i ashi.

Assam nung district aser sub-district tentetba atema Gogoi-i iba osang metetdaksü.

"Himanta Biswa Sarma kijai dang mapa ajak inyaker. Assam atema nisung kati dang telemtetba agir ama lir" ta Gogoi-i ashi.

"Assam nung sub-districts tentettsü atema legislative assembly nung jungjunga jembitsüla. Iba onük atsütepa mejembi tashi lemtet thinena atatsüla kechiyong nisung aikati ibala inyakyim ya jungjunga mejembitepi meinyaksüla ta bilemer" ta pai ashi.

"Lemtet agitsü atema inyakyim kar lir saka BJP sorkari iba inyakyim sülen manidaker" ta MLA Gogoi-isa metetdaksü.

TIPRA Motha tanishiri Amit Shah den ajurutep

Agartala, August 26, 2023 (Agencies): Taoba Tipra Motha chairman aser chuba jabaso Pradyot Kishore Manikya Debbarma-i New Delhi nung Union Home Minister Amit Shah den ajurutepogo.

Iba mapang pai lisopur temeten aser onüktem lemsatep.

"Ni tanü Union Home Minister Amit Shah den ajurutepogo. Künati by-election indang mejembi. India sorkar den onoki Tripasa nung onük dang jembir aser tekaratiba nung lemtet agiba ajanga terata aser temulung melemtep malitsü" ta Pradyot-i ashi.

"Pradyot Manikya-i tanü Delhi nung Amit Shah den

senden tajung ka menogo. Tenati tang olemtepa aruba onük aser lisopur temetentem indang jembi" ta BJP Northeast Coordinator Sambit Patra-ia metetdaksü.

Tripura aser linük nung lisopurtem temeten kümzüka ayutsü aser tashi itdaksütsüba Prime Minister indang alizüng lir ta Patra-isa ashi.


Tripura by-election nung nübortemi CPIM magizüker: CM Manik

Agartala, August 26, 2023 (Agencies): Taoba Left Front sorkari Boxanagar Assembly Constituency nung terenlok mapa kecha meinyak ta Tripura Chief Minister Dr. Manik Saha-i tai tongloksüogo.

Iba jagi September 5 nü by-election nung iba assembly constituency nung alirtemi CPIM party magizüksü lemtetogo ta pai ashi.

Sepahajala district kübok Pristhapramukh Sanmelan nung o jembidang Dr. Saha-i iba ya metetdaksü.

"Ni Boxanagar Assembly Constituency semdang aser idangji iba Constituency senzüka yutsüba angudang kanga aoksa. Iba assembly



Dr. Manik Saha

nungi MLA aser Minister aika adoka inyaka parnoki mapa kecha meinyak. Parnok candidate mali. Nüboyimba mapang parnoki koma jembitsü ta ni ratar. Nübortemi parnok magizüksü" ta CM Saha-isa metetdaksü.

"Ni Boxanagar Assembly Constituency nung kilen sema

senzüdang parnoki tesüiba aibelentem nung ajemdaker BJP pusemtsü lemtetba angashiogo. Nübortemi CPIM magizüker kechiyong BJP-i 'Sabka Saath Sabka Vikas' tangatetba nung inyaksangshir" ta pai ashi.

Congress aser CPIM nung dena alir ajak BJP nung adentsü mepishir, ta CM Dr. Saha-isa metetdaksü.

"Asenok double-engine government lir aser iba engine nung taktang tazüng aika lir. Congress aser CPIM atema inyakeronok onok den adentsüla. September 8 nü nübortemi Tofajjal Hossain nem takok ngudaksür benjungteptsü ta ni amanger" ta Tripura Chief Minister-isa ashi.



Meghalaya kübok East Jaintia Hills district nung aliba Sonapur tunnel nung anentsüh tulu alua anenbanga aliba noksa nung angur. Tesüiba anogo ishika tzünglu kanga aruba ajanga NH 6 nung Sonapur tunnel anenbang aser gari noklang aika anendena lir. Iba ajanga Tripura, Mizoram aser Assam kübok Barak valley leni aoba traffic noktangogo ta ketdangsürtemi ashi.

Australia aser Philippines nati military drills ayongzüka agiogo



August 25 nü Manila anütoktiplen Zambales province kübok San Antonio nung Philippine aser Australia nung sepaitem military exercise ka nung shilem agiba mapang tangokba noksa nung angur.

Manila, Luroi/August 26 (Agencies):

South China Sea nung security dak sendakba nung Australia tejangraba ka lir aser mangatetep aliba tziyüm nung külemi patrol asütsü atema Philippines den longjemer inyaksü, ta Australia Defence Minister Richard Marles-i ashi.

Australia aser Philippines sepaitem aser parnok den United States Marines 2,000 inyakyim asadangka mapang Marles-i iba olen lemsatepa liasü. Sepatem ya joint exercises nung shilem ka ama amphibious landing aser air assault drills nung shilem agia liasü, kong Philippine tir Ferdinand Marcos Jr-a dena liasü.

South China Sea nung Manila aser Beijing na mangatetep aliba asendenshir aliba mapang ka nung iba drill ayongzüka agiogo. Drill nung sepaitem ya tziüküm ka agitsü atema amphibious assault vehicles, parachute aser US Osprey aircraft ajanga arua liasü.

Australia indang F-35 fighter jets anati anüng nungi parnok nem teyari agütsü aser Australia indang warships temi iba asetkong meteka aliba tziyümtem nüka ata liasü.

Anüng, tziyüm aser ali nung agiba drill ya Australia aser Philippines na tsüngda tang mezüngbuba exercise tulu ka ayongzüka agiba lir aser drill mapang ka tsükchirtemi azüoker aliba asetkong ka meyipa agiba ama jilushia liasü.

Tir Marcos-i osangbenertem dang ashiba agi, Philippines-i, kidanger linük military tem den

tesendaktep tajungba küma yanglushiner.

Marles-i, drill agiba sülen Australia aser Philippine navy na longjemer yakta South China Sea nung mezüngbuba patrol ayongzüka agitsü.

Paisa, tziyüm dak sendakba nung temzüng oziung kübok UN Convention kübok arbitration tribunal kati 2016 küm China-i South China Sea ajunga ya parnok meyong ta ashiba magi kümdaktsüogo aser tziyüm nung 200-nautical-mile (km 370 shi) exclusive economic zone Philippines' tazüokba kübok lir ta ashi.

China-i arbitration nung shilem agitsü memulunger aser arbitration tribunal-i obendang agütsüba ya magizüki tziyüm ya timba parnok meyong ta shia arudar.

"Tsükchirtem Australia tziüküm nung tetsüng majemok tsüngda teraksatsüba aika adokdaksütsü akok aser ozi linük security wazüka ayutsü atema Southeast Asia nung arok security nung temzüng oziung dak amendaker aliba tetuyuba benoktsü kanga tongtibang lir," ta Marles-i Hokolbarnü osangbenertem den sensaksemba mapang ashi.

Mangatetep adoker aliba tziyüm nung China-i tanga linük a m o k m e r e n t s ü s a inyaksangshiba tali küma aoba indang tanga linüktem den US, Australia aser Philippines nung yimjak nung aja arudar, ajisüaka Philippine military-i ashiba agi, Hokolbarnü ayongzüka agiba drill ya Beijing

dak rangloker agiba masü.

August 5 nü Philippine nung sepaitem amenoka aliba Second Thomas Shoal-i tenüngdakba osettsüt balala bener otsüba mapang China nung indang coast guard rong kati water cannon ka amshia nokdangtsü merangba sülen mangatetep adoker aliba tziyüm nung Philippines aser China na mangatetep adoka liasü, koba linük ana tsüngda mangatetep adokyonga aruba nung tesüsabuba asütsü.

Iba dak sendakba nung Australia aser US nati, China indang coast guard rong inyakyim aitsüogo aser parnoki Philippines pusemba lemsatepogo.

Iba tatalokba sülen Washington-i ashiba agi, South China Sea densema Asia nung parnok tembar tejentiba Philippines indang sepai, rong aser tayimtsütem makra parnoki Philippines kümzüksü atema nokdaksüsa akümtsü ta tekümdangtsü metetdaksüogo.

Mongolbarnü Philippines nung rong anati China-i tenokdangka agütsür aliba adena süitetogo, aser iba tatalokba ya osangbenertem ajangshia liasü.

China-i US dang iba ken o nung mejungshitsü tekümdangtsü metetdaksüogo, koba parnoki ashiba agi, Asia mangatetep ka lir.

Philippines, Malaysia, Vietnam, Brunei aser Taiwan nung ajaki South China Sea nung parnok shilema lir ta shia arudar.

Pakistan police-i kiralongrar ti apu

Islamabad, Luroi/August 26 (Agencies): Punjab police Counter Terrorism Department-i Honibarnü ashiba agi, parnoki punjab kübok tesem balala meita aoba mapang kiralongrartem sentong kar rakasatsüogo.

Pakistan kübok Punjab province nung ISIS aser Al-Qaeda densema tanga kiralongrar teloktem nungi kiralongrar ti linük law enforcement agencie-i puogo, ta police-i Honibarnü metetdaksü.

CTD-i ashiba agi, itangitertem nungi osang tejangja angazükba sülen parnoki province kübok district balala nung tesem 74 meita aoba mapang prangbong, tapoktsütem aser tanga tenokdangka osettesütem den külemi kiralongrar asütsü ta temulung melemi bilemer nisung ti puogo.

Kiralongrartem ya tenokdangka agütsür aliba ISIS aser Al-Qaeda telok nungia liasü.

Kiralongrartem ya Liaqat Khan, Muhammad Hasan, Shan Faraz, Gul Karim, Ayub Khan, Muhammad Umeer, Ameer Muawiya aser Rizwan Siddiq ta jangjaogo. Kasa sangdong ajanga ashiba agi, parnok ya

Daesh, Al-Qaeda, Tehreek-e-Taliban Pakistan, Sipah-e-Sahaba Pakistan aser Lashkar-e-Jhangvi teloktem nungi lir.

CTD-isa, kiralongrartem ya Lahore, Rawalpindi, Multan aser Gujranwala nungi pua liasü.

Tapoktsü gram 200, hand Granade ana, IED bomb ka, detonator teku, protective fuse wire süklep 29, tenokdangka agütsür aliba kaketterem aser ISIS wako ka ta parnok ket nungi nguteta liasü.

"Pua aliba kiralongrartem province kübok tesem balala aser tongtibang tesemtem aser tekülemdak balala amaktsü sentong yanglur liasü," ta CTD-i ashiba den police-i parnok anema ken o tenet benokogo aser ken o ashishitsü atema parnok mejangjaba tesem kati anirogo.

Taoba hopta CTD-i, ISIS commander ka densema kiralongrar 23 pua liasü.

CTD ketdangsürtemi ashiba agi, hopta tsüngda parnoki meita aoba sentong 700 ayongzüka agiogo aser temulung melemi bilemertem 135 puogo.

Meita aoba mapang nisung 16,784 dang ken o ashishia liasü, ta ketdangsürtemi shisem.

Moscow anasa Ukraine nung indang drone khadang


Mozcow, Luroi/August 26 (Agencies):

Russia indang air defence-i drone amshia Moscow amaktsü merangba nokdangogo, ta yimti mayor-i ashi, koba iba hopta unmanned aerial vehicles (UAVs) temi Russia yimtiba amaktsüba merangdangka tesüsabuba lir.

Moscow Mayor Sergei Sobyenin-i Honibarnü ashiba agi, Moscow anüolen Istra district nung defence systems-i drone ka khadangogo.

Drone khazüka yokba tesem nung emergency service tem liasü aser iba tatalokba nung teraksatsüba adokba mesüra nisung asüba indang osang kecha mali, ta Sobyenin-i Telegram messaging app ajanga metetdaksü.

Honibar anepdang yakta drone-i amakba sülen ketdangsürtemi linük yimtiba nung amenoka aliba tayimtsü anendak tongtibangba asem khen atema shibanga liasü.

Russia indang military-i ashiba agi, taoba hopta ishika tsüngda Ukraine nung indang missile ka aser drone temi Russia nung indang litsü

amaktsü merangogo aser Moscow nung tayimtsü anendak tongtibangba asem Sheremetyevo, Domodedovo aser Vnukovo nung khen atema tayimtsü senzusenpongtem sota atatsüsa aküm.

Osang ajanga ashiba agi, Mongolbar, Bodhbarnü aser Hokolbarnüa Moscow nung tayimtsü anendak minpronga liasü.

Drone amshia tesüsabuba Russia amakba ya Ukraine-i nangzüka mali aser aji dang masü Ukraine-i Russia amakba mesüra Ukraine kübok Russia-i amokbanger aliba tesemtem amakba indang yimjak nung menangzüki arudar.

Russia Ministry of Defence-i Hokolbarnü ashiba agi, parnok indang sepaitem Ukraine nung indang drone teku khazüka yokogo aser "electronic warfare" amshia drone 33 nokdangogo, koba Russia-i taoba küm nungi tenezüka Ukraine amakba sülen Kyiv-i Moscow-i amokbanger aliba Crimean peninsula drone amshia amakba tulutiba liasü.



Taoba US tir Donald Trump, Fulton County jail, Atlanta nung booking inyakyim tembangba sülen bond nung chiokogo, ta CNN sangdong ka ajanga metetdaksü. Tepuokdak record ajanga taoba US tir ya aputsü tetuyuba agütsü aser Brehostibar aonung Georgia election subversion ken o dak sendakba nung Fulton County jail nung book süa liasü.

Asian Games atema Bala Devi team nung züngoksemogo



BALA DEVI

Luroi/ August 26, 2023 (Agencies): Taoba India tetsür team captain aser nüngtugu striker Bala Devi küm pezü sülen taruba Asian Games 2023 atema züngsem 22 agi kümteba national team nung züngoksemogo.

Bala Devi tatemsa 2019 küm India tenüng nungi Kathmandu nung South Asian Games nung shilem agia liasü.

Hangzhou, China nung asayatsü atema Asian Games atema India team nung Bala Devi züngoksemba atema team nem tajanzük agütsüsü.

Bala Devi ya 2005 küm nungi India tenüng nung international jenjang balala nung asaya arudar aser lai

tajangshiba aika bena lir. Lai tang tashi nung India team nungi asayaba mapang asaya 46 nung goal 36 idaktsür lir.

Bala Devi-i goal kanga junga idakja asayatetba ajanga la 2020 küm Scottish Women's Premier League club Rangers nungi ita 18 asayatsü asoshi maongka ngua liasü.

La Rangers nungi asaya 9 nung shilem agi aser goal ana idakja liasü. La ya India tsürtem rongnungi Europe nung professional club ka nungi asaya-a goal idaktsüba mezüngbuba asayar lir.

Scottish league nung lai mezüngbuba goal idaktsüba ya Ranger's puri 2020 küm

December 6 nü goal 9-0 agi Motherwell akokba asaya nung idakja liasü.

Ajisüaka la ACL (Anterior Cruciate Ligament) yiruba aser surgery agitsüsa akümba ajanga Rangers nungi mapang tatsüka dang asayatet aser yirur aliba kanga junga anepalutsüsa aküm.

Bala Devi shibai AIFF Women's Player of the Year naroküm asemben agizükogo, la head coach Thomas Dennerby-i ayongzükba national camp nung taküm küm tetenzüklen shilem agia liasü.

Iba sülen la Indian Women's League nung küm ka atema Odisha FC puri alizüka liasü.

Asian Games nung India team Group B nung Chinese Taipei aser Thailand den ata lir.

Asian Games atema India tetsür team yamai alitsü:

Bala Devi, Astam Oraon, Jyoti, Manisha, Renu, Ritu Rani, Sanju, Sangita Basfore, Elangbam Chanu, Dalima Chhibber, Grace Dangmei, Soumya Guguloth, Shreya Hooda, Indumathi Kathiresan, Ashalata Devi, Priyanka Devi, N Sowmiya, Sweety Devi, R Sandhiya, Ranjana Chanu, Anju Tamang, Pyari Xaxa.

AS Roma-i Sardar Azmoun alizükogo

Luroi/August 26, 2023 (Agencies): Iran nunger forward Sardar Azmoun, Honibarnü Bayer Leverkusen nungi loan nung arua Roma den denogo, ta club sangdong ka ajanga metetdaksü. Kasa mapang nung Roma pur tang Chelsea nungi asayar Romelu Lukaku den tenanzüktepba yanglutsü merangba mapang ka lir.

Roma-i ashiba agi, parnoki Azmoun 2024 küm June 30 tashi asayatsü atema anir aruogo aser pa den teti atema tenanzüktepba yanglutsü asoshi lenmang sadema lapoka yuogo.

Azmoun-i linük team nungi asayaba mapang asaya 71 nung goal 45 idaktsür lir. Pa 2021 küm January ita Leverkusen-i aoba sülen pai goal pongu dang idakja junga masayateti aliba mapang ka nung Roma-i aruogo.

Ajisüaka pa iba club-i aruba ya Lukaku arutsü akok ta osang adokba ajanga amokbangogo.

Chelsea puri Lukaku ayoktsü meranga aruogo, ajisüaka Inter Milan aser Juventus napronglai pa malizüktsü telemteba agi.

Inter pur pa alizüktsü atema Chelsea den sensaksema liasü



Sardar Azmoun

saka pa meima Juventus aser AC Milan den sensaksemdar ta angazükba sülen toktsü.

Taoba ita Inter captain Lautaro Martinez-i, Lukaku teammate tem dang nungi atsükshishiba aser call magizükba atema mepelaba lemsatepa liasü.

Summer transfer window tembangtsü hopta ka dang lia teti atema ayoktsü asoshi lenmang makai akümba sülen Lukaku loan nung yoktsü atema Chelsea aser Roma na sensaksemdar.

Inter-i Chile nunger asayar Alexis Sanchez tanaben alizükogo



Alexis Sanchez

Luroi/August 26, 2023 (Agencies): Chile nunger international asayar Alexis Sanchez, Olympique de Marseille nungi Inter Milan-i tanaben meyipa aruogo, ta Serie A club yagi Honibarnü sangdong ka ajanga

metetdaksü. Sanchez shibai 2021-22 season tembangba sülen Inter toktsür Marseille nung oa aden pa free transfer nung tanaben meyipa aruogo aser 2024 küm tashi asayatsü atema tenanzüktepba yangluogo.

Taoba season pa Marseille nung 44 ben asaya aser iba mapang pai goal 18 idakja liasü.

Arishi küm 34 tain asayar ya Chile nunger asayartem rongnungi goal timtiba idaktsüba asayar lir aser pa Barcelona, Arsenal aser Manchester United nungia asayaogo. Pai Inter Milan nungi asayaba mapang tetoktepba ajak senteper asaya 109 nung goal 20 idaktsü, kong 2021 küm Serie A akoba densema lir.

Taoba season Inter pur Serie A nung tasembuba nung tembang aser Champions League final tonga asayaba den Italian Cup aser Super Cup naprongla koka liasü.

Taoba season Marseille nungi asayaba mapang pai goal 14 idakjaka pa France nung amendaker aliba club yagi chioka liasü.

66th National Shooting Championship atema Yimyakumla qualify süogo



Dimapur, Luroi/August 26 (TYO): Naga tsür Yimyakumla, 66buba National Shooting Championship 2023 atema qualify süogo, koba taküm küm tatemlen asayatsü.

Sungratsu yimtsüng nungi arishi küm 13 tain asayar ya Dimapur district nung alir ka lir aser lai tang Shillong nung asaya aliba 10buba North East Zone Rifle/Pistol Shooting Championship 2023 nung silver medal ka aser bronze medal ana

angu aser iba national asayamung atema qualifying score tongteta liasü.

Iba osang ya Nagaland Rifle Association tir Merang Jamir-i metetdakja liasü. Kasa mapang nung Lanu Rongsenkaba Jamir-ia, 10m Air Pistol Master Men category nung silver medal ka ngua liasü.

North East Zone championship nung ajak sentper Nagaland tenüng nungi shooter 17-i shilem agidar.

NZ den T20 asaya atema Tongue melen Chris Jordan shimogo

New Delhi, Luroi/August 26 (TYO): New Zealand den T20I asayamung asayatsü aliba atema All-rounder Chris Jordan Honibarnü England team nung züngoksemogo.

Jordan-i pacer Josh Tongue melenogo, shiba yiruba ajanga iba asayamung nung shilem magitetsüsa kümogo.

Arisi küm 34 tain Jordan ya T20I nung England team nung



Chris Jordan

asayartem rongnungi wicket timtiba agiba asayar lir.

England aser New Zealand na T20I asaya pezü asayatsü aliba ya Bodhbarnü Chester-le-Street nung tenzüktsü aser iba sülen Old Trafford, Edgbaston aser Trent Bridge nung asayatsü.

T20I asayaba sülen ODI asayatsü, koba September 8 nü tenzüktsü.

BILEMDANGANG

"Ajemaluba ya tashimaitba temaitsü masü."